

## Рамазон ойи ҳақида



17:00 / 09.05.2020 1553

Курайб розияллоҳу анҳудан ривоят қилинади:

«Умму Фазл бинти ал-Хорис уни Шомга, Муовиянинг олдига юборган эди. У айтадики:

«Бас, Шомга келиб, у(Умму Фазл)нинг ҳожатини бажардим. Мен Шомдалигимда Рамазон кириб қолди. Ҳилолни жумъа кечаси кўрдим. Сўнгра ойнинг охирида Мадинага келдим. Ибн Аббос мендан:

«Ҳилолни қачон кўрдингиз?» деб сўради.

«Уни жумъа кечаси кўрдик», дедим.

«Сен ўзинг кўрдингми?» деди.

«Ҳа, одамлар ҳам кўрдилар. Рўза тутдилар. Муовия ҳам рўза тутди», дедим.

«Лекин биз шанба кечаси кўрдик. То ўттиз кунни тамомламагунимизча ёки уни кўргунимизча тутаверамиз», деди.

«Муовиянинг кўргани ва рўза тутгани билан кифояланмайсанми?» дедим.

«Йўқ, Расулуллоҳ соллаллоҳу алайҳи вассаллам бизга шундай амр қилганлар», деди».

Бешовларидан фақат Бухорий ривоят қилмаган.

Ушбу ҳадисга амал қилған баъзи уламолар «Ҳар ўлка одамлари ҳилолни ўзлари кўрадилар ва ўшанга биноан амал қиласиллар», деганлар.

Аммо жумҳур уламолар «Агар бир ўлкада ҳилолни кўриш сабит бўлса, бошқа ўлкалар ҳам ўшанга амал қилиши керак», деганлар.

Умуман, бу масалада уламоларнинг фикрлари кўп. Ҳозирги кунимизда ҳам бу турли фикрлилик давом этиб келмоқда. Мазкур масаладаги баъзи тушунмовчиликлар аста-секин йўқолиб бормоқда. Ажаб эмаски, ахийри ҳамма мусулмонлар бир хил фикр ва амал қиласиган даврлар ҳам келиб қолса.

**«Ҳадис ва ҳаёт» китобидан**